



Komunikadu Inprensa

Període : Fevereiru 2012
Edisaun : 20 Fevereiru 2012

Tribunál Distrital Oe-Cusse aplika pena multa \$ 60 Dolares Amerikanu ba “Oknum P N T L” ne’ebé komete krime Violénsia Doméstika

Iha loron 08 Fevereiru 2012, Tribunál Distritál Oe-Cusse hala’o audiénsia julgamentu ba kazu violénsia doméstika ho número prosesu 75/PCO/2011/TDO. Kazu refere komete husi kondenadu Batista Neno hasoru vítima Maria Cob, iha Aldeia Behala, Suco-Bobocase Sub- Distritu Pante-Makassar, Distritu Oe-Cusse iha loron 22 Marsu 2011.

Julgamentu dirije husi juiz singular, Dr. Joao Ribeiro, Ministériu Públiku representa husi Dr. Jasintu Babo Soares no arguidu rasik hetan defeza husi Dr. Sebastião Amado Nheu de Almeida husi Eskritóriu Defensór Públika.

Diretór Ezekutivu JSMP, Luis de Oliveira Sampaio haktuir katak *”Tribunál Distrital Oe-Cusse hatudu tan pasu importante ida ba oin liu husi desizaun ne’ebé Tribunál halo hodi kondena autór ba kazu krime violénsia doméstika liu-liu tanbá arguidu ba kazu refere nu’udar oknum PNTL ida ne’ebé loloos tenki hatudu hahalok ne’ebé diak iha sosiadade nia leet. Tanbá ne’e, autór sira ne’ebé hala’o kna’ar iha TDO merese hetan apresiasaun ba dezempeñu hirak ne’ebé sira kontinua produz.*

Tuir JSMP nia hanoin katak desizaun ne’e mós nu’udar konfirmasaun ida ba públiku tomak katak sidadaun hotu-hotu hanesan iha lei nia oin hanesan konsagra ona iha Artigu 16 Konstitusi da Republika.

Bázeia ba akuzasaun Ministériu Públiku katak, iha loron 22 Marsu 2011, maiz ou menus tuku 22:00 kalan vítima husu arguidu atu taka odamatan tanbá kalan ona tauk asu tama uma. Arguidu la kohi tanbá kondisaun manas ne’e duni arguidu ho vítima diskute malu la kleur arguidu nervozu no rasta vítima depois soe ba parede halo vítima hetan sofre kanek iha parte ulun. Tanbá kauza husi agresaun ne’e, vítima consegue ba halo tratamentu iha hospitál Referál Oe-Cusse no hetan suku pontu tolu iha parte ulun.

Ba arguidu nia hahalok ne’e, Ministériu Públiku akuza arguidu tuir artigu 35 Lei Nú.7/2010, konabá violénsia doméstikano konjuga ho artigu 145 pontu (1) Kódigu Penál.

Iha audiénsia julgamentu arguidu hili nia direítu nonook tuir artigu 60 pontu (c) Kódigu Prosesu Penál. Bázeia ba vítima nia deklarasaun haktuir katak, iha tempu akontesimentu arguidu mai ho kondisaun lanu, tanbá kalan ona vítima husu arguidu hodi taka odamatan no janela maibé arguidu la kohi tanbá sente manas, nune'é arguidu no vítima diskute malu halo arguidu nervozu no rasta vítima depois soe ba parede rezulta vítima sofre kanek iha parte ulun.

Iha alegasaun finál Ministériu Públiku nian, husu tribunál atu aplika pena multa ba arguidu tuir artigu 145 Kódigu Penál.

Bázeia prosesu produsaun no ezaminasaun provas relasionada ho kazu ne'e, inklui deklarasaun vítima nian, mezmú durante audiénsia julgamentu arguidu hili nia diteru nonok, maibé bázeia ba deklarasaun iha primeíru interogatóriu arguidu rasik deklarata katak nia rasta no soe duni vítima ba parede no rezulta vítima kanek iha parte ulun.

Bázeia ba faktus hirak ne'ebé ható'ó iha audiénsia julgamentu husi parte vítima nomós bázeia ba deklarasaun iha primeíru interogatóriu tribunál konsidera nu'udar provas ne'ebé provadu no provas sira refere sufsiente atu tribunál aplika pena multa ba arguidu. Ba kazu ne'e ikus mai tribunál hamonu pena multa ho valor \$ 60 Dolares Amerikanu. Iha desizaun ne'e, arguidu iha obrigasaun atu selu multa iha loron 60 nia laran, no arguidu mós iha obrigasaun atu selu kustus judisiál ho osan valor \$ 10 Dolares Amerikanu.

Mesmu JSMP fiar katak desizaun tribunál la'ós nu'udar úniku atu bele asegura ema la halo krime violénsia doméstika ba futuru maibé desizaun tribunál nu'udar elementu no medida esensiál ida husi medida sira seluk atu eduka públiku katak violénsia doméstika nu'udar aktu kriminál. Tanbá ne'e, ba kualker individu ruma ne'ebé komete ka involve iha prátika violénsia doméstika sei hatan ka sei ba responsabiliza iha tribunál.

Atu hetan informasaun kle'an favor kontaktu direitamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Landline: 3323883